

Powšitkowne WOZJEWJENJA

njedźelu, 16. februara 2014

Zhromadny dzeń za 1. a 2. lětnik

Pod hesłom „Pój, wjesel so!“ přeprašuje dekanatne dušepastyrstwo srjedu, 26. februara, wot 9.00 do 15.00 hodź. džěci 1. a 2. lětnika na zhromadny dzeń w prózdinach do Don Boskoweho domu we Worklecach. Zajimcy njech so prošu hač do pjatka, 21. februara, pod telefonowym čisłom (03 57 96) 8 87 07 přizjewja. Za wudawki dnja zběra so wot kóžděho wobdźělnika přinošk we wysokosći třoch eurow.

Wudobywanju kaolina pola Różanta so spřećiwjeć

Składnostnje posedženja peticiskeho wuběrka Sakskeho krajneho sejma nastupajo móžne wudobywanje kaolina blisko hnadowneho městna su młode swójby z Różanta namołwili, demonstraciju přewjesć. Zetkać měli so wšitcy, kotřiž to podpěruja, štwórtk, 20. februara, w 9.30 hodź. na parkowanišću při hnadownej cyrkwi. Dokelž je to za čas prózdin, móže so wosebje wjele młodych ludźi na tym wobdźělic. Přihotowane móža měć wšitcy transparenty, na kotrychž swoju wolu zwuraznjeja, zo su přećiwu tomu, blisko hnadowneho městna Różanta kaolin wudobywać ze wšěmi z tym zwisowacymi sčěhami, ale zo chcedža swoje putniske městno z cyłym jeho ambientom zachować. Čim wjace ludźi – a to ze wšěch generacijow – so na protestnej akciji wobdźěli, čim skutkowniša tuta budže. Towarstwo Cyrila a Metoda z.t. kaž tež towarstwo „Naša Knjeni na Lipje“, kotrež je peticiju z něšto wjace hač 4.500 podpismami krajnemu sejmej přepradało, akciju podpěrujetej.

Serbske kemše w Drježdźanach

Drježdźanscy Serbja, jich přiwuzni a přećeljo su wutrobnje přeprašeni na serbsku Božu mšu njedźelu, 23. februara, w 17 hodź. do cyrkwy swjateho Antonija w Drježdźanach-Löbtauwje, Bünauska 10. Božu službu změje farar Gabriš Nawka. Po kemšach zetkamy so k serbskej bjesadže.
Marjana Bubnerjec

Serbske blido w Drježdźanach

Wšitkich, kotřiž w sakskej stolicy kontakt k Serbam pytaja a kotřiž chcedža so prawidłownje zetkawać, přeprašuje towarstwo Stup dale pónđzelu, 24. februara, wot 20 hodź. do hosćenca „Hebedas“ w Drježdźanach-Nowym měsće na Rothenburgowej 30. Tajke serbske blido ma so přichodnje tam, hdys a hdys tež na druhich městnach, kóždu třeću pónđzelu w měsacu wotměwać. Rezerwowanja městnow dla je krótkte přizjewjenje pola Franciski Nowakec pod e-mailowej adresu stup.dale@googlemail.com trěbne. Runje tak móža zajimcy wot njeje nadrobnosće zhonić kaž tež přichodne terminy serbskeho towarstwa w Drježdźanach.

Dalekubłanje w medijowym džěle

„Wěru wobswědčec w džensnišim swěće. Nowinarske a zjawnostne džělo za cyrkej“ rěka hesło lětušeho medijoweho dnja Drježdźansko-Mišnjanskeho biskopstwa. Tutón wotměje so sobotu, 22. měrca, wot 10 do 15.30 hodź. w Drježdźanach. Dopałdnja je wopyt rozhlósoweho domu sčelaka MDR předwidžany. Popołdnu wotměja so wšelake workshopy za medijowe a zjawnostne džělo w Benowym gymnaziju. Zarjadowanje přewjedže so za duchownych a lajkow Drježdźansko-Mišnjanskeho biskopstwa kaž tež za sobudźělaćerjow zwjazka Carity. Zajimcy njech so přizjewja z mailku hač do pjatka, 14. měrca, w nowinarskim běrowje biskopstwa w Drježdźanach, presse@bistum-dresden-meissen.de.